



**Uunga siunnersuut: Soraarnerussutisiaqarnissamut aaqqissuussinermut pinngitsoorani ilaanissaq pillugu Inatsisartut inatsisaata allangortinneqarnera pillugu Inatsisartut inatsisaat nr. xx, xx. xxx 2019-imeersoq**

**(Aningaasaqarnermut Nunanilu Avannarlerni suleqatigiinnermut Naalakkersuisoq)**

Naalakkersuisunut ilaasortap Naalakkersuisut sinnnerlugit aaliangiiffigisassatut siunnersuutaanut qulaani pineqartumut qujalluta, matumuuna Inuit Ataqatigiinniit imaattumik oqaaseqaateqassaagut.

Soraarnerussutisiaqarnissamut aaqqissuussinermut pinngitsoorani ilaanissaq pillugu Inatsisartut inatsisaata allangortinneqarnissaanik, imaluunniit § 4-ip imm. 1-ani pkt-mik nutaamik tassalu imm.12-mik tassamik ikkussisoqarnissaanik Naalakkersuisut siunnersuuteqarput.

Naalakkersuisut taamatut allannguinnissamik siunnersuuteqarnerminnut tunngavilersuutigaat, soraarnerussutisiaqarnissamut aaqqissuussinermut pinngitsoorani ilaanissaq pillugu Inatsisartut inatsisaat nutaaq 2018-mi atuutilersinneqartoq. Borgmesterit, viceborgmesterit, kommunimut ilaasortat assigisaallu, tjenestemandit assigalugit soraarnerussutisiassaminnik sillimmaserneqareersimasuupput, taamaattumik Inatsimmi tassani nutaami 2018-mi atuutilersumi ilaasussaannikkaluarlutik ilanngunneqarsimallutik. Taamaalilluni ilanngunneqarnermikkut marloriaammik ileqqartussanngortitaasimallutik.

Taamaattumik; Inatsisip nutaap uuma 2018-mi atulersimasup allangortinneratigut, Borgmesterit, viceborgmesterit assigisaallu, marloriaammik soraarnerussutisianut sillimmaserneqarnissaat piumasaaqatigineqartariaarutissaaq, taamaattumillu borgmesterit, viceborgmesterit, assigisaallu akissarsiaat soraarnerussutisiaqalernissamut aaqqissuussinermut peqataasussaataitanermut naatsorsuinerminni tunngavissani ilaatinneqartariaarullutik.

Tamatuma saniatigut Inatsisartut inatsisaata kalaallisut qulequtaa oqaatsinut atorneqartunut nalinginnaanerusunut naleqqunnerusunullu allangortinneqassasoq aamma siunnersuutigineqarluni.

Inatsisissap allannguutissaa manna pineqartoq tusarniaassutigineqarsimavoq, tusarniaanerullu ajunngitsumik ingerlasimatut Inuit Ataqatigiinniit nalilerparput.

Taamaattumik annerusumik oqaaseqarfigeqqinnagu Naalakkersuisut allannguutissatut siunnersuutaat taamatut isikkoqartillugu Inuit Ataqatigiinnit akuersaarparput.

Qujanaq

Peter Olsen